

समे — 12:25

<><><><><><>

PM Modi

प्रधानमंत्री नरेन्द्र मोदी अज्ज अहमदाबाद च बोचासन्यासी अक्षर पुरुषोत्तम स्वामी नारायण संस्था स्वर्ण जयंति समारोह गी वर्चुअली संबोधत करगन। इस मौके पर गृहमंत्री अमित शाह, गुजरात दे मुख्यमंत्री भूपेन्द्र पटेल हुंदे इलावाराज्य कैबिनेट दे मंत्री बी इस समारोह च शामिल होने लेई अहमदाबाद दे नरेन्द्र मोदी स्टेडियम च मजूद राँहगन। आकाशवाणी संवाददाता दी रिपोर्ट मूजब इस कार्यक्रम च 1 लख बाप्स स्वयंसेविएं गी शामिल कीता जाग। बोचासन्यासी अक्षर पुरुषोत्तम स्वामी नारायण संस्था बाप्स दे स्वयंसेवएं दी सेवा गी सम्मानत करने आस्तै साल भर चलने आले कार्यक्रम स्वर्ण महोत्सव दा उद्घाटन 28 जनवरी 2024 गी महंत स्वामी महाराज होरें कीता हा। महान स्वर्ण समारोह अज्ज नरेन्द्र मोदी स्टेडियम च अज्ज सम्पन्न होग। इस कार्यक्रम च दुनिया दे 30एं मुख्य थमां इक लख थमां बद्ध स्वयंसेवी हिस्सा लैगन। महोत्सव च बक्ख-बक्ख तौर तरीके कन्नै स्वसेविएं दे योगदान ते बलिदानें गी उजागर कीता जाग।

<><><><><><>

KV School

केन्द्र सरकार नै मुख्य भरै च 85 नमें केन्द्र विद्यालय खोलने दी मंजूरी देई दित्ती ऐ, जिंदे चा 10 जम्मू खित्ते च बी शामिल न। कल संजा नमीं दिल्ली च मंत्रिमंडल दी बैठक मगरा मीडिया गी जानकारी दिंदे होई सूचना ते प्रसारण मंत्री अश्विनी वैष्णव होरें आखेआ जे इनें नमें केन्द्र विद्यालयें दे खुल्लने कन्नै पूरे मुख्य च तकरीबन 82 जहार 560 विद्यार्थिएं गी सस्ती ते उच्ची गुणवत्ता आली शिक्षा हासल करने दा मौका थहोग। केन्द्र शासत प्रदेश जम्मू कश्मीर च कुल 13 केन्द्र विद्यालय खोले जांगन, जिंदे च 10 जम्मू खित्ते च ते 3 कश्मीर खित्ते च होंगन। मंत्री होरें एह बी घोषणा कीती जे नवोदय विद्यालय योजना तैहत देसे च 20 नमें नवोदय विद्यालय उनें जिलें च खोले जांगन जित्थें इस योजना तैहत अजे तोड़ी स्कूल नेई खोले गेदे न। एहदे कन्नै 15 जहार 600 बच्चें गी फायदा होग।

<><><><><><>

Smart India Hakhthon

स्मार्ट इंडिया हैकाथान दा 7मां संस्करण 11 दिसम्बर गी मुख्य दे 51 बक्ख-बक्ख केन्द्रें च शुरू होआ'रदा ऐ जिंदे च आईआईटी जम्मू बी इक ऐ, एहदा उद्घाटन शिक्षा मंत्री धर्मेन्द्र प्रधान होर वर्चुअल ढंगे नै करगन। एह हैकाथान इक पैहल ऐ विद्यार्थिएं गी इक मंच उपलब्ध कराने दी जेहदे नै ओ रोजमर्रा दे जीवन च आने आलिएं समस्याएं गी हल करी सकन ते नोजवानें च समस्याएं दा हल तुप्पने आली सोच विकसित होई सकै। एहदे पिछले संस्करणें आला लेखा विद्यार्थिएं दियां टीमां किट्ठे रलियै मंत्रालयें, मैह्कमें दे उद्योगें आस्सेआ दस्सी गेदिएं ते कन्नै अपने कोला 17 विषयें पर बक्ख-बक्ख श्रेणिएं च समस्याएं दा हल लेइयै आई सकदे न।

<><><><><><>

Arms

जिला प्रशासन जम्मू नै जम्मू जिले दे सब्बने बंदूकें दे लाइसेंस धारकें गी निर्देश दित्ता ऐ जे थेआर (संशोधन) कनून 2019 दे प्रवधानें दा पालन करन ते जेकर उंदे कोल 2 शा मती बंदूकां न ते बाद्दू बंदूकें गी जमा कराई देन। जिला मैजिस्ट्रेट जम्मू आस्सेआ जारी कीते गेदे हुक्म मूजब 2 शा मती बंदूकें आले पंछाने गेदे लाइसेंस धारकें गी इक हफ्तें दे अंदर-अंदर अपने अतिरिक्त थेआरनेइमे पुलस थाने च सौंपने होंगन।

<><><><><><>

Winter Vacation

स्कूली शिक्षा मैहकमे नै कश्मीर डिवीजन ते जम्मू डिवीजन दी स्याले आले जोन हेठ औंदे हायर सकेंडरी तगर दे सब्बने सरकारी ते मान्यता प्राप्त प्राइवेट स्कूलें लेई सयाले आली छुट्टियें दी घोषणा कीती ऐ। साढ़े संवाददाता दी जानकारी मूजब सरकारी हुक्म मताबक 5मीं जमात तगर छुट्टियां 10 दिसम्बर 2024 थमां 23 फरवरी 2025 तगर रौंहगन, जिसलै के 6मीं थमां लेइयै 12मीं जमात तगर दे बच्चे लेई 16 दिसम्बर 2024 थमां 28 फरवरी 2025 तगर रौंहगन। सरकारी स्कूलें च हाई ते हायर सकेंडरी अमलें गी बोर्ड दे मतेयानें लेई 10 फरवरी 2025 थमां अपने अपने मुख्यालय च रिपोर्ट करने दा निर्देश दित्ता ऐ। एहदे अलावा अध्यापकें गी छुट्टिएं दरान विद्यार्थिएं दे मार्गदर्शन लेई ऑनलाइन उपलब्ध रौहने दे बी निर्देश दित्ते गे न।

<><><><><><>

Cricket India Austrelia

आस्ट्रेलिया दे एडेलेड ओवल मैदान च खेड्डे जा'रदे बार्डर गवास्कर श्रृंखला दे दूए टैस्ट मैच दे दुए रोज आस्ट्रेलिया दी टीम नै अपनी पैहली पारी च 5 विकेट दे नुक्सान पर 208 रंज बनाई लैते दे हे। एहदे शा पैहले कल पैहले रोज भारत दी पूरी टीम 44 ओवरें ते 1 गेंद खेड्डियै 180 रंज पर आउट होई गई ही। 5एं टैस्ट मैचें दी इस श्रृंखला च पैहला मैच जित्तिथै भारत फिलहाल 1-0 कन्नै अग्रे ऐ।

<><><><><><>

UNGA

संयुक्त राष्ट्र नै भारत आस्सेआ प्रस्तावित, कुलसंसारी सतह पर "ध्यान दिवस" मनाने दे सुझाह गी मन्नी लैता ऐ। भारत दे कन्नै लिक्टेंस्टीन, श्रीलंका, नेपाल, मैक्सिको ते अंडोरा नै बी सांझे तौरा पर एह सुझाह संयुक्त राष्ट्र राष्ट्र महासभा नै कल शुक्रवारें आम सैहमति कन्नै इसी पास करी दित्ता ते हुन हर ब'रे 21 दिसम्बी गी इस ध्याड़े गी कुलसंसारी सतह पर विश्व "ध्यान दिवस" दे रूपै च मनाया जाग।

<><><><><><>

Weather

जम्मू प्रांतै च सीत हून बधना शुरू होई गेआ ऐ ते पिछले किश दिनें थमां घट्टोघट्ट तापमान 10 डिग्री सैल्सियस कोला हेठ गै रवा करदा ऐ। मौसम विभाग मूजब जम्मू च कल दिने दा बद्धोबद्ध तापमान 22.2 डिग्री सैल्सियस, जिसलै के रातीं दा घट्टोघट्ट तापमान 8.6 डिग्री सैल्सियस दर्ज कीता गेआ।

<><><><><><>